



*Minggu, 5 Juni 2022*  
**Ogen: Nehemia 9:6**



**“Tuhan Si Pegeluhsa”**



I bas pertoton Tuhan, kalimat si pemena ibelasken e me gelarNdu ipebadia min. Ertina Dibata e tetap ipermuliaken. Kai dasarna? Dibata e me si mada kerinana, Dibata si nagturken doni enda ras kerina isina. Bage me pe pertoton bangsa Israel tupung ia ngakuken kesalahen ras dosa-dosana i lebe-lebe Tuhan, si pemena ibelaskenna e me 'Kam o Tuhan, Kam saja ngenca Tuhan, ibahanndu kerina langit ras bintang-bintang langit, ibahanNdu taneh, lawit ras kerina isina. Kam si pegeluhsa kerinana, kuasa-kuasa i langit nembah erjimpuh man baNdu.' Jadi i bas pertoton e si pemena ibelasken e me pujin man Tuhan si nepa doni ras kerina si nasana bage pe singaturken kegeluhen kerina tinepaNa.

Pengakun maka Tuhan me si mada kerinana ras si pegeluhken kerinana e cukup penting. Lit i je teridah hubungenta ras Tuhan si mehuli, kita tinepa ras Tuhan si nepasa. Hubungan si mehuli ras Tuhan teridah lalap arah pertotonta. Buah pertoton e situduhkan arah mediate man tinepa si deban si radu ngeluh kita i babo doni enda.

Selain wari Pentakosta, wari enda si peringeti wari lingkungan hidup se doni, si encidahken kerina si nasa lit i doni lit kawitenna sada ras sidebanna. Langit ras benda-benda langit, taneh, lawit ras kerina isina, enda me temannta tading i doni enda, ras e me ikataken lingkengen sekelewetta. Buah pengakunta maka Dibata nge si njadikensa ras IA ka nge si mereken kegeluhen man kerinana, si tuduhkanlah maka kita ermediate man lingkengen e, mpekena-kenasa, ras njagaisa gelah tetap mehuli. Lingkungan e pemere Dibata man banta, itamakenna kita i je tading, nggeluh mejuah-juah. Kegeluhen si mehuli e me perlu lalap iterusken, kita me si ipake Tuhan nerusken kegeluhen e. Kerina tinepa Dibata min mejuah-juah, ngasup nggeluh sempabu sada ras sidebanna. Mediate man lingkengen e me pendilo man kerina anak Dibata.

*Buah pertoton, mediate man lingkungan*